



**MENSAJEN HUSI SUA EXELÊNCIA PRIMEIRU-MINISTRU
KAY RALA XANANA GUSMÃO
KONA-BA BA ABERTURA APREZENTASAUN NOITE
KULTURAL**

**KOMEMORASAUN BA 10º ANIVERSARIU KONSULTA
POPULAR**

Palasiu Governu, Díli

30 Agostu 2009

Exelênsias

Ilustre Konvidadus

Señoras no Señores,

Ho prazer no emosaun boot mak ha'u koalia ho ita boot sira hotu ba loron 10 ° Aniversariu Konsulta Popular – no ba Kalan Teatru Kultural ida ne'e.

Ha'u mos fo ben-vindu ba ita nia belun barak husi comunidade internasional mak ohin iha ne'e hamutuk ho ita hodi komemora no selebra aniversariu ida ne'e. Loron 30 de Agostu 1999, hanesan loron importante boot ida ba timoroan hotu, **loron ida ne'ebe ita realiza ita nia esperansa no ita nia mehi, hanesan Povu, hanesan Nasaun.**

Maibe, loron ida ne'e mos halu ita hanoin ho fuan-kanek no laran susar ba sira ne'ebe luta no terus hodi halo loron ida ne'e sai realidade, sira ne'ebe ohin loron la iha ona iha ita nia let hodi selebra hamutuk lorin ida ne'e.

Sira iha ita nia fuan ohin no ba nafatin!

Iha selebrasaun hirak ne'e, ho homenajen no gratidaun ba sakrifisiu ba ita nia aman no inan sira, ita nia maun, bin, oan no alin sira. Se la'os tamba sira, ohin ita la iha ne'e hodi selebra festa aniversariu Konsulta Popular ne'ebe ita nia Indepedensia moris no hafoin ita nia Nasaun.

Señoras no Señores,

Ha'u hakarak aproveita oportunidade ida ne'e atu agradese no rekonese esforsu ita nia belun comunidade internasional halo, ne'ebe fo esperansa ba ita nia Povu iha tempu susar nia laran ne'ebe kontribui hodi halo ita nia mehi sai realidade.

Ita nia Nasaun sorte tebe-tebes hodi hetan belun diak hosi mundu tomak no kultura oin-oin.

Ho laran haksolok ha'u fo obrigadu barak ba ita boot sira mai hamutuk ho Povo hodi selebra festa kalan ida ne'e.

Señoras no Señores,

La iha dalan di'ak ida atu selebra okaziaun ida ne'e ho teatru ida hodi hatudu ita nia kultura timor no ita nia identidade.

Ita nia heransa kultural klean, no refleto ita nia Povu nia klamar, no ita nia rai nia riku soin

Ohin kalan, ita selebra parte sentral husi ita nia kultura Timor ne'ebe uniku - ita nia muzika no dansa tradisional, mak iha fatin importante iha sosiedade Timor, no partilla esperiensa no istoria ita nia comunidade nian.

Ida ne'e dezempeña papel fundamental ida hodi hatudu ita nia sentimentu, no mos ita nia rekonsiliaun, no klaru iha ita nia selebrasaun. Ita nia muzika no dansa promove ita nia valor komun, no haburas kultura toleransia, dignidade no dame.

Paz no estabilidade mak ita buka hafoin tempu barak liu – no agora ita bele sente orgullu boot ba akontesimentu ohin ne'e, mos reprezenta pontu-referensia ba ita nia futuru.

Ita konsege hakat kapitulu difisil ida tan iha ita nia istoria, ita dehan hela adeus ba konflitu, ba instabilidade, ba inserteza, no ho determinasaun mak ita hakuak dame no dezvoltimentu hodi hadi'k ita nia Povu nia vida-moris.

Ida ne'e aspirasaun komun ba povu Timoroan hotu, no ita hanesan Povu prova katak bainhira ita serbisu hamutuk, ho unidade, solidariedade no objetivu komun, ita bele alkansa ita nia mehi.

Señoras no Señores,

Ohin, ita hamutuk iha ne'e, rihun ba rihun, no mós iha Distritos, maluk sira iha ne'ba sei hare husi transmissaun direkta, atu sinti, atu fó ba malu hanoin diak no laran diak, espíritu humanu ne'ebé nakonu ho paz no vontade, iha solidariedade no amizade entre ita rasik no rai seluk.

Ohin mós, ita selebra ita nia liberdade no ita nia kultura, hanesan aktu ida atu selebra loron aban nian ne'ebé diak liu.

Ita hotu sei hare, sei rona ita nia labarik sira, ita nia foin sa'e sira nia valor no nia talentu.

Maluk sira tomak,

Iha selebrasoens ohin loron nian, amigos Timor-Leste nian barak mai hamutuk ho ita i ita nia Presidente da República, hodi Povo nia naran, kondekora balun-balun ona.

Obrigadu ba imi hotu!

Kay Rala Xanana Gusmão

30 Agostu 2009